

# Mas ku un Storia di Makaku

Makaku ta pone nos smail. P'esei algun hende ta hari ora nan ta pensa di evolushon. Ma evolushon ta algu muchu mas serio ku un storia di makaku. Un bataya formal ta tumando lugá relashoná ku origen di universo, mundu, bida, bida humano, èts. E debate ta entre evolushonistanan i proponentenan di kreashon.

Talbes no ta importábo si mundu a originá dor di evolushon òf kreashon. Di bo perspektiva, esaki no tin afekto riba bo bida. Ma bo ta kiboká. **Bo kreensia tokante e origen di universo tin un impakto enorme riba bo mes, bo famia, i bo komunidad.**

Pensa un ratu tokante evolushon. Segun e teoria aki, biones di aña pasá un “kos” deskonosí konsistiendo di ún molekül so a aparesé *pa kasualidat*. (Evolushonistanan no por splika kon e “kos” ei a yega na eksistensia.) *Pa kasualidat* e molekül a multipliká i eventualmente kos material a aparesé. E multiplikashon a kontinuá i *pa kasualidat* kos sin bida a produsí bida. Sèlnan bibu a krese te *pa kasualidat* nan a bira un rèptil primitivo. E rèptil a sigui desaroyá i *pa kasualidat* for di dje a resultá diferente sorto di bestia. Un di nan, makaku, a aparesé i *pa kasualidat* hende a originá for di makaku.

Tres pregunta filosófiko ta sumamente importante pa kada persona kontestá: 1) Di unda mi a bin? 2) Pakiko mi t'aki? 3) Unda mi ta bai? Si bo ta aseptá e teoria di evolushon, anto **lo bo konkluí ku bo ta eksistí pa kasualidat, ku bo ta nada mas ku un aksidente**. Si esei ta bèrdat, anto **bo eksistensia ta sin proposito**. Bo ta riba mundu pa e mésun motibu ku qualke bestia, pasobra **bo ta nada mas ku bestia**...maske talbes un bestia hopi desaroyá. I kiko di bo destino? **Lo bo kaba na nada** méskos ku tur otro bestia!

Ki afekto e teoria aki tin riba bida? Hopi! Si nos ta siña nos yunan ku nan ta eksistí pa kasualidat, ku nan bida no tin proposito, ku bida ta terminá na morto, anto kriminalidat i dekadensia moral den nos komunidad no mester sorprendé nos.

Nan lo rasoná lógikamente, si tur kos ta kaba mañan, mihó saka tur e sous for di bida awe, djòdjò miéntras bo tin rosea, asta si ta kontra moralidat òf ta ilegal! Si un hende tin algo ku bo ke, hòrt'é i gos'é awor! Bo ke sèks? No laga moralidat tenébo atras! Bo ta solamente un bestia i ora nan kurpa ta pidi, nan no ta limitá na un partner so. Bo ke sinti e poder di mata un hende? Pakiko no eksperensia e aventura ei? Den e bida aki so bo por sintié...i pa kolmo e defunto ta solamente un bestia sin destino. Biba pa gosa awe. Si esei ta enserá droga òf alkohòl, dal bai! **Mihó muri kontentu, pasobra mañan tur kos ta kaba!**

Un filosofia di bida basá riba e teoria di evolushon por guia na depreshon i bida ta sin proposito—bo t'aki pa kasualidat i djis lo bo desparesé pa semper. Pakiko sigui soportá bida? Mihó buska un salida di e bida aki.

Ma en kontraste di evolushon, si Dios a krea tur kos i ta sumamente interesá den Su kreashon, anto **ningun persona ta eksistí pa kasualidat; kada un tin gran balor pa su Kreador**. Hesus a bisa, “*Dos mòfi no ta wòrdu bendí pa ún sèn? I ni un di nan lo kai na suela si no ta e boluntat di boso Tata? No tene miedu; boso bal mas ku un kantidat di mòfi*” (Mateo 10:29,31).

Nos Kreador ta laga sa ku morto no ta fin di eksistensia humano. “*Ta destiná pa hende muri un biaha so i despues di esaki ta bin huisio*” (Hebreonan 9:27). Despues di morto, E lo huzga tur hende. Shelu òf fièrnu ta e destino final di hende.

Si bo aseptá e relato bíblico di kreashon, esei sigur lo afektá bo filosofia di bida. **Lo bo tin proposito pa biba: pa agradá bo Kreador. Lo bo ke prepará pa ser huzgá p'E** na fin di bida, ora E lo determiná bo destino etèrno. Lo bo ke konfia Kristo komo bo Salbador i biba manera E ke.

Evolushon òf kreashon ta un desishon serio entre dos filosofia di bida kontradiktorio...no solamente un storia di makaku!